

姜先生全集



姜先生全集



澁園未定稿卷十

全集十

邑後學

馮保燮

重編

王定祥

墓誌銘

江南布政使司參議前戶部右侍郎櫟園周公

墓誌銘

故江南布政使司參議前戶部右侍郎櫟園周公卒於江甯之里第踰年嗣子在浚撰次行事屬某銘其幽某謝不敏則曰子無辭先君之志也謹按狀周氏世金陵人始祖匡仕宋參江西撫州軍事因家焉其

後三徙定居櫟下至公祖贈鴻臚寺序班庭槐游大
梁而樂之因占籍開封遂爲開封人焉鴻臚生子文
煒卽公父國子監生任諸暨簿能不卑其秩數以事
與令抗德施於民然終以不合解去公年弱冠卽挺
拔所交多海內知名士其天性儻蕩不羈飲酒歌詩
意豁如也庚辰成進士授濰令是時山左蹂躪所望
無堅城濰被圍久公以一書生乘障親集鏃其身城
以不陷事聞會徵天下廉卓行取授浙江道監察御
史未幾京師破乙酉詔起公以御史招撫兩淮尋改
兩淮鹽法道升海防兵備道遷福建按察使踰年升

布政司右布政尋轉左首尾在閩八年其以按察駐
節邵武也邵武在萬山中嘯聚彌山谷城外烽火燭
天公權宜治軍事募敢死士日開門轉戰谿谷間多
所擒獲夜則獨坐譙樓上仰天長嘯賦詩高詠衛士
擊刁斗聲中夜與相聞事少閒建詩話樓祀宋嚴滄
浪其上召邑諸生能詩者日與唱和境內益安任左
布政使釐剔宿弊老胥束手小民受惠至不貲而後
議者猶撫拾不根以相排陷自爲右藩時屢奉檄厯
署建南汀南漳泉諸道皆數反側危地人所顧卻不
敢就獨單車往來鋒鏑中百方經略所至輒見紀故

自內召出境及被劾還質質竟傳逮復入都百姓皆
扶老攜幼頂香迎道左爭奏酒食勸盡觴或閉里門
撤橋梁阻行不得則號哭聲動天竟數百里已乃建
祠立石俎豆之自其去淮南時已然而泣閩最久故
民德之益深長老相傳自來方面使臣去任無若此
者閩詩人高兆作四泣詩紀其事初公以左副都御
史徵上章言閩事報可又密有所建白頗摘扶用事
者驟擢戶部右侍郎而聞者咋舌曰禍始此矣未幾
督臣果飛章劾奏詔赴閩勘比到前督已罷去會福
州海寇亂撫臣藉公威重使分城守當一面賊大創

去城得完公功第一然謙弗敢言囚服退就質按察
使與五司理會鞫得其寃狀列狀上中丞時久旱牘
具雨大澍民爲作歌曰東卷雨云復逮下刑部訊秋
有詔朝審部院大臣下及各科道官東西以次列有
頃兩吏舉大簾前後獄辭凡數十案滿簾置中庭公
亦自列狀一通出袖中傳示諸大臣諸大臣讀未竟
於是大風從西北起揚塵沙蔽天旋入庭從手中掣
所讀紙直望空去人吏披靡天地晝暝晦人對坐不
見面公獨跪階下叩首呼寃口不得發默自念曰天
豈哀我耶吾死生此刻決矣良久風定冢宰倡言曰

天意如此此獄可疑於時同列者齊聲應曰可疑堂
上下環列數十人無一誰何者故事獄上可疑者報
聞卽釋而是時適傳恩赦凡已論囚槩減等公反以
赦例當隨輩徙塞外待春發遣緣 大行遺詔免尋
以僉事出青州海防道公生平喜爲詩凡按部所過
山川風俗及臨陣對敵呼吸生死居閒召客讌飲詠
嘯吹彈六博掄袂獻笑無不以詩爲遊戲心拈口授
史不給書而訟繫前後數年所得詩尤多方坐獄堂
下健卒猙獰立銀鎗纍纍呼囂聲如沸手拳據地顧
伍伯乞紙筆作送客游大梁詩二十絕句投筆起對

簿詩語皆驚人素與黃山吳生善吳從公獄中久其
爲北雪詩序略日記初冬予與生夜坐爲詩漏下數
十刻嗚嗚吟不止或至心傷則相對泣嘗對卧薄板
上忽聯句成兩人擁敗絮從口吻中溼不聿露臂爭
書薄板躍起短燭撲滅一笑而止其高致如此按青
治如在閩時升參議江南督糧道復遭劾解職聽勘
事解尋卒公材器揮霍善經濟喜議論疾齷齪拘文
吏當大疑難剗斷生殺神氣安閒無不迎刃解者自
筮仕卽在兵間尋擢臺職益欲以意氣自奮不幸遭
亂歸才爲時需十年之間晉厯卿貳然時時與世抵

摺庚戌再被論忽夜起徬徨取火盡燒其生平所纂述百餘卷曰使吾終身顛踣而不偶者此物也辛亥冬某遇公西陵佛寺留飲厯數其少年來意中得失事拊几瞪目太息謂予曰吾與子相見今無幾今年六十子歸爲我作恕老堂酌酒歌而已恕老堂者公所居著書處也予渡江詩不果作然竊歎公之才其轆軻厯落而老且衰於此視其中默默如不自聊將遂已也循公之迹考公之志則古之大人君子其身尊名立人望之若不可及而當其壯年逾邁俯仰身世出處盛衰之故其皆有不自得者乎則夫世之

辭富貴而就貧賤甯獨善其身以置生民之休戚理
亂於不顧至於老死而不悔者彼亦誠有所激也嗚
呼可以知公矣公好獎與後進嘗置一簿坐上與客
言海內人才某某輒疏記之諸所嘗經過雖深山穴
處中物色無不到見少年能文士觴辭隻韻立爲延
譽或數屏車騎過之出其名字老生貧交相依如兄
弟其爲文及詩機杼必自己出語矜創獲不蹈襲前
人一字薊鉢湔濯而歸之大雅尤嗜繪事及古篆籀
法每天明盥漱出外舍從客談說古今圖史書畫方
名彝器皆條分節解盡其指趣客退則手一卷燈檠

熒然至夜分歸寢以爲常公諱亮工字元亮別號櫟園元配馮淑人生子五在浚國學生考充官學教習在延庠生在建在都在青皆國學生孫男女四人卒年六十有一將以某月日葬於某原銘曰

謂莫知耶爲大司農謂逢其時胡蹶而終詭轡偃規滑稽乃容予不忍爲奚辭固窮烏石巍巍滔滔大江文蒸武施維公予功公之德威汔於數邦肆我文辭砭鍼瞽聵萬派千枝於海朝宗如賁待槌如懸待撞晚厯嶽嶠益放而洪誰其司之命彼祝融悠悠我思蒼蒼彼穹北山之崖嗟櫟園公

掌京畿道事監察御史任公墓誌銘

今年夏四月二十有六日御史任公病卒於官嗣子筠偕其弟塤坪將以某月日歸葬於某鄉之某原以狀來請銘按狀公諱珙字少玉希庵其別號中順治十五年會試十八年成進士康熙八年選知山西石樓縣事考選授浙江道監察御史巡視長蘆鹽政回院晉掌京畿道事卒年五十六歲任氏世大梁人始祖仕宋爲高密尹家焉名其所居里曰梁尹社曾祖鎧太原府通判祖澄父復皆邑文學復贈如公官母鹿氏贈安人初公兄弟四人伯瑛早卒仲琪季珂相

肩隨受經外傳公姿性開敏所讀書過目卽能了其
大義弱冠操筆爲文已與兄琪齊名矣乙未琪第進
士積官至禮部員外郎後三年公遂聯舉南宮會聞
贈公疾不待廷試立馳歸時禮部亦解登州學職歸
養公與其兄第三人侍疾視藥劑溫涼燥溼問起居
食飲宜適與否必謹沒則盡哀斂送以禮由是鄉里
稱之其爲石樓也邑故磽瘠民間不知紡織公令家
置紡具教之法月責布一端賞罰其勤窳者於是民
始興於婦工縣去河東解池幾千里而食平陽鹽轉
運萬山中勞費以數倍民苦淡食公議食汾鹽固請

於上官乃得民至今蒙利御史巡城時以軍興攤門
稅移屬於工額外無敢私分豪入視鹺政疏劾巨蠹
爲商民患者釐剔宿弊盡根株乃止還臺封章十餘
上中如免粵西帶徵錢糧及軍政宜與大計同行請
爲宣聖廟立碑疏俱得旨施行然公意猶未已也每
朝回簾閣據几伸紙舐筆摹晉魏人書數十行濃淡
疏密皆有意謂子弟曰吾作書萬慮俱遣亦收放心
一事然知公者以公雅不好閒窺其微意如有不自
聊賴者無已而託之於書又卒晦其說如此雖子弟
不欲令其盡知可悲也公素友愛自前年冬禮部去

世明年第明經繼之日益傷悼不自勝遂至不起初
公以御史需次於家邑大歎與禮部捐粟三千石食
餒者所全活數萬人故死也人莫不哀之遺書有敬
事初編二卷元配閻氏累贈安人繼丁氏封安人筠
閻出貢生塤坪丁出塤邑文學坪舉人女三長適諸
城候補行人司司正李濰潤次適邑文學王自惇次
適登州文學沙汝肥孫三士錡士銘士鉞銘曰
爲吏也良躋於廟堂嘉言用彰不容容而居不逐逐
而趨命止於斯而志則有餘落落寞寞其中有託豈
其於世有不如意不歌而喟世真可棄澤未究施算

不及耆我銘之辭其言孔悲

贈工部營繕清吏司主事加十級張公墓誌銘

予至都之二年歲癸亥秋今工部主事撫甯張君有園在阜城門外東北陬修登高故事置酒召客南北知名士會飲者三十餘人於時主客衣冠濟楚揖讓登進禮容之盛尊罍几席圖史之設上下池館流眄花竹客無不灑然意得者酒酣以往分曹限韻各賦詩一章以退蓋是時都下文會寂寥久矣明日相傳以爲盛事予亦因是始識工部君先是君尊甫贈光祿公已棄世二十餘年太夫人在堂君自是以終養